


TEZAU LITURGIC
6 APRILIE

SLUJBA
SF. CUVIOS-
MĂRTURISITOR
SEBASTIAN
FOMIN
DE LA OPTINA



MOSCOVA, 2000



Служба

преподобноисповеднику

Севастиану Карагандинскому

На малой вечерни

Стихиры поем на 4, глас 6:

От юности Господеви последовав, / родителей и
любовь мирскую оставив, / в Оптиной пустыне с
духоносными старцы вселился еси, / постных
житие держа во смирении, / новомучеником
Российским споследуя, / гонение от безбожных,
радуясь, терпел еси, / хладных пределов
Караганды достигл еси, / идеже чистое житие,
горя духом, скончал еси, / Христа Воскресша,
яко бисер чудный, стяжав, / сия благодати
причаститися / и нас сподоби отче Севастиане
досточтиме.

Терпел еси кротко, / от злочестивых богоборцев,
/ бием, укоряем, и ураняем за Господа, / Егоже
желал еси, досточтиме, / мира сего красная в
ничтоже вменив, / странничество многотрудное
со страстотерпцы Христовы возлюбил еси, /
равноангельный монашеский образ смиренно
нося, / но являет тя Подвигоположник Христос,
/ в Церкви Своей светильника веры / и изрядна
исповедника.

В светозарные дни Пасхального торжества, /
равноангельное житие твое, скончав,
священное, / чудеса совершаеши еси изрядна и
преславна. / Предстоя Богу, тебе подавшему
залог Божественен / и венец нетленен и славу
вечнующую. / Того убо моли, Севастиане,
досточтиме, / егда яко Судия приидет /
избавитися всякого озлобления / почитающим
священную память твою.

Слава, глас тойже:

Сый со Отцем на престоле святем, / пришед на
землю, от Девы родися, / плотию распныйся и
погребыйся и воскресый, / на небеса паки
восшедый, Духа Утешителя верующим дарова,
вопия: / аще кто хочет в след Мене идти, / да
отвержется себе и крест свой понесет, / сему
усердно последуя, / высоту приял еси небесную,
/ Севастиане, досточтиме, исповедниче
Христов.

И ныне, Богородичен гласа.

На стиховне стихиры, глас 4:

Плотию перстною обложен, / дух молитвою
воскрилял еси, / и к Богу умом восходя, /
горняя доброты зрел еси славу, / сего ради на
тленную мира сего красоту / и безумный мятеж
бogoотступных человек / скорбно взирал еси / и,
воздыхая, слезы проливал еси, / в небесное

отечество преселитися желая, / досточтиме
Севастиане.

Стих: Священницы Твои оденуты в правду, / и
преподобнии Твои возрадуются.

Великую твою благодати святыню / всем
концем Церкви Русския возвещают чудеса твоя.
/ Како бо человек грешник / возможет такова
знамения творити? / Воистину, свят еси,
Севастиане преподобне, / прославляет тя
Господь, яко прославльшаго Его / пред человеки
на земли / и на небеси пред Отцем Своим.

Стих: Блажен муж, бояйся Господа, / в
заповедех Его восхощет зело.

Демоном страшная твоя молитва, / кротости и
смирения исполненная, / величия твоего
виновна бысть, / тоя бо светом выну озаряем, /
Христов ум стяжал еси, блаженне, /
неизглаголанная таинства познавая, / будущая,
яко настоящая зрел еси, / на путь истины и
спасения / всех приходящих к тебе, наставляя.

Слава, глас 1:

Досточтиме отче Севастиане, / чистоты
сокровище, / погибающих помощниче, / даждь
нам твердую руку помощи твоя / и грехми
присно погружаемых, / от смертоносных глубин
изведи / и прочее жития время / в покаянии
истеннем скончати нам помози / и от вечнаго
гнева спастися сподоби.

И ныне, Богородичен гласа.
Тропарь писан на великой вечерни.

На великой вечерни

Блажен муж: 1-й антифон.

На Господи возвах стихиры на 8, глас 5:

Радуйся, богоносе отче Севастиане, / от млада
Христа Бога возлюбивый / и чистотою Тому
прилепивыйся / детскою верою
последствовавый, / в простоте сердца Тому
послуживый / и разум духовный от Него
приявый, / в светозарную Оптину пустынь к
старцам духоносным пришел еси, / ихже
благодати по преемству унаследовав, / испроси
нам мир и велию милость.

Радуйся, преблаженне отче Севастиане, / плач
неутешный демоном наведый: / людие бо, им
верно служившия и работавшия, / тобою
апостольски наученнии и духовно
просвещеннии, / попраша богопротивную
гордыню их, / и Бога прославляша в душах и
телесех своих / подающего верным мир и велию
милость.

Радуйся, преподобне Севастиане, / волею
Христу сораспныйся, / душевных страстей
умершвлением пострадавый, / всеконечно греху
умерый, / нетлению же и бессмертию воскресый
/ и ангельски во плоти поживый, / великое

множество человек ко Христу привел еси, /
присно Тому моляся, / даровати миру мир / и
душам нашим велию милость.

Радуйся, досточтиме Севастиане, / от Бога
священствовати положен был еси воистину, /
умом чистым, сердцем смиренным и душою
кроткою службу Тому принося, / беды претерпел
еси и гонения, и болезни, / проповедания ради
Божественныя истины, / юже житием и словесы
твоими заключенным в лагерях являл еси, /
немошныя укрепляя и верныя утверждая
несомненною надеждою на Христа / темже и
ныне нас к прилежной молитве сподвигни: /
испросити миру мир и душам нашим велию
милость.

Радуйся, прозорливе старче Севастиане, /
помошая жезлом словес твоих / и расточенное в
гонениях стадо Христовых словесных овец, / в
бескрайних Казахстанских степях рассеянных /
и многия лишения и болезни от губящих я
волков терпящих / вокруг себе под благодатный
кров Царицы Небесныя собрал еси, / прилежно
Заступнице мира молитися / даровати миру
мир / и душам нашим велию милость.

Радуйся, богомудре Севастиане, / отцу верных
Аврааму подобник неложен, / Божественному бо
Промышлению себе конечно вручивый, /
гонения от безбожных кротко терпя, / отечества

произгнан был еси / и в хладныя
Карагандинския степи на страдания и смерть
верную сосланный, / Иовлеву стяжал еси в
болезнях крепость / и Давидово смирение,
терпением проявив, / житие равноангельное на
земли пожил еси, / и желание получил еси
конечное, / престолу Пресвятыя Троицы в
радости святых предстоиши днесь, / усердно за
паству свою моляся: / даровати миру мир / и
душам нашим велию милость.

Радуйся, преподобных сожителю Севастиане, /
великаго старцев Оптиных духоносного сонма
сопричастниче, / целомудрия образ и
воздержания правило, / благочестия
провозвестниче и умиления источниче, /
Православия утверждение непоколебимо, /
уставов Оптиных твердый хранителю, /
Пресвятыя Богородицы и Иоанна Предтечи
верный служителю, / исцелений струя
приснотечная / монашествующих явился еси
удобрение, / и всему стаду твоему пастырю и
учителю.

Радуйся, богоносе Севастиане, / течение
воздержания непреложно совершивый, / и веру
святую непорочно соблюдый, / венцем правды
украшенный, / егоже уготова ти Христос
Господь, / по достоянию подавая воздаяние: /
яко священнотаиннику чисту и пастырю

предоброму, / яко земну во плоти Ангелу и
страдальцу терпеливу. / Тому усердно, отче,
молися / даровати нам мир и велию милость.

Слава, глас 8:

Емуже всего себе от младенства возложил еси, /
Егоже во уме твоём присно молитвою обносил
еси, / Егоже чистотою сердца твоего стяжал еси,
/ Егоже ради вся сладкая мира отринул еси, /
Егоже ради гонения, лишения, биения,
уничуждения, благодарне претерпел еси, /
Святых Святейшему Иисусу Сладчайшему, /
Иже слуги Своя огонь палящий творяй, /
преподобне Севастиане, всею крепостию твоею
приверженный / пламенем Духа Святаго тебе
обильно исполнившего, / во еже терние
страстей и грехов наших пожигати, / тьму же
неразумия просвещати, / и всем верным путь в
Царство Небесное отверзати.

И ныне, Богородичен, глас тойже:

Царь Небесный за человеколюбие на земли явился
/ и с человеки поживе, / от Девы бо Чистыя
плоть приемый / и из Нея прошедый с
восприятием, / Един есть Сын, сугуб естеством,
/ но не Ипостасию. / Темже, совершенна Того
Бога / и совершенна Человека воистину
проповедающе, / исповедуем Христа Бога
нашего: / Егоже моли, Мати Безневестная, /
помиловаться душам нашим.

Таже вход. Прокимен дне. Чтения три
преподобнически:

Премудрости Соломони чтение (глава 3):

Праведных души в руце Божией, / и не
прикоснется их мука. / Непщевани быша во
очесех безумных умерети, / и вменися озлобление
исход их, / и еже от нас шествие - сокрушение;
/ они же суть в мире. / Ибо пред лицом
человеческим, аще и муку примут, / упование
их бессмертия исполнено. / И в мале наказани
бывше, / великими благодетельствовани будут, /
яко Бог искуси я и обрете их достойны Себе. /
Яко злато в горниле, искуси их / и яко всеплодие
жертвенное, прият я. / И во время посещения
их возсияют / и, яко искры по стеблю, потекут.
/ Судят языком и обладают людьми, / и
воцарится Господь в них во веки. / Надеющиеся
Нань разумеют истину / и вернии в любви
пребудут Ему, / яко благодать и милость в
преподобных Его / и посещение во избранных
Его.

Премудрости Соломони чтение (глава 4):

Праведник, аще и постигнет скончаться, в
покои будет. / Старость бо честна не
многолетна, / ниже в числе лет исчисляется. /
Седина же есть мудрость человеком, / и возраст

старости - житие нескверное. / Благоугоден
 Богови быв, возлюблен бысть, / и живой
 посреде грешник, преставлен бысть. / Восхищен
 бысть, да не злоба изменит разума его / или
 лесь прельстит душу его. / Рачение бо злобы
 помрачает добрая / и парение похоти пременяет
 ум незлобив. / Скончався вmale, исполни лета
 долга, / угодна бо бе Господеви душа его, / сего
 ради потщася от среды лукавствия. / Люди же
 видевше, и неразумевше, / ниже положише в
 помышлении таковое, / яко благодать и милость
 в преподобных Его / и посещение во избранных
 Его.

Премудрости Соломони чтение (глава 5 и 6):
 Праведницы во веки живут, / и в Господе мзда
 их, и попечение их у Вышняго. / Сего ради
 примут Царствие благолепия / и венец доброты
 от руки Господни, / зане десницею покрывает я и
 мышцею защитит их. / Приимет всеоружие
 рвание свое / и вооружит тварь в месть врагом.
 / Облечется в броня правды / и возложит шлем
 - суд нелицемерен. / Приимет щит непобедимый
 - преподобие, / поострит же напрасный гнев во
 оружие, / споборет же с ним мир на безумных. /
 Пойдут праволучныя стрелы молниины / и, яко
 от благокругла лука облаков, на намерение
 полетят. / И, от каменометных ярости исполнь,

падут грады. / Вознегодует на них вода
морская, / реки же потопят я нагло. / Сопротив
станет им дух силы, / и, яко вихор, развеет их, /
и опустошит всю землю сильных. Слышите убо,
царие, и разумеите, / навыйкните, судии концев
земли. / Внушите, держащий множества и
гордящийся о народах язык. / яко дана есть от
Господа держава вам / и сила от Вышняго.

На литии стихиры, глас 6:

Днесь, православнии, священное совершаем
торжество, / память чтуще приснопамятного
отца и старца и заступника нашего
преподобного Севастиана, / ангела бывша
невещественным житием, / священника Бога
Вышняго и проповедника благодати, / пророка
же, яко будущая прозираше, / доброго
исповедника, яко за Христа пострадавша от
безбожных гонителей. / Темже и со
дерзновением молится / даровати миру мир /
и душам нашим велию милость.
Приидите христоименитые людие, / от конец
Казахстанския земли совокупившесе, /
приидите воспоим преподобного старца
Севастиана Карагандинскаго, / иже, яко облак
светел и росоносен, нам явися, / пламень
праведно движимаго на ны за грехи наша гнева
небеснаго утишающий, / и страстей душевных и

телесных зной охлаждающий / излиянием
 умиленных молитвы своея, / и изсохшая наша
 сердца оживляющий, / плоды же доброделания
 приносить помогающий / всем с верою и
 любовью притекающим к нему.

Чистотою совести твоя сияя, / смерти телесныя
 не страшился еси, / сего ради и своих си
 всеконечне отрекся, / с равноангельными
 Оптиными старцами пожил еси, / гонения же
 и многотрудныя страдания от богопротивных
 прияв, / апостольски в заключениях
 благовествуя, / просветил еси помраченныя
 человеки / и Христу привел еси прежде
 диавольскую ловитву, / Храм Пресвятей
 Богородице во граде Караганде воздвигл еси, /
 не яко господствуяй, но яко служаи, во
 обращенных тобою пожил еси, / смирением и
 кротостию украшаем, / темже и Бог тебе
 превознесе / и дарова тебе благодать просити
 миру мир, / и душам нашим велию милость.

Слава, глас 5:

Радуйся днесь Казахстанская страна, / красуйся
 и ликуй, Богоспасаемый град Караганда, /
 приявша землею своею токи кровей
 новомучеников Российских / и бесчисленная
 страдальческая тех тела. / Многолетне в
 недрах своих покаявша / и святая мощи
 преподобнаго Севастиана исповедника, /

воздаяние от Христа неизглаголанное
восприявшего, / егоже едино имя бесом
губительно есть, / Ангелом равностоятеля, песнь
трисвятую воспевающа / и молящася о душах
наших.

И ныне, Богородичен, глас тойже:
Храм и дверь еси, / палата и престол Царев, /
Дево Всечестная, / еюже Избавитель мой,
Христос Господь, / во тьме спящим явися, /
Солнце сый правды, просветити хотя, / яже
созда по образу Своему рукою Своею. / Темже,
Всепетая, / яко матерне дерзновение к Нему
стяжавшая, / непрестанно моли спастися
душам нашим.

На стиховне стихиры, глас 2:
Честный и светоносный, преподобне Севастиане
исповедниче, твой праздник, / радости светлая
исполнен и веселия духовнаго. / Темже монахов
и христоименитых людей множество
сошедшеся, / псалмы и песньми восхваляем
прославльшаго тя, Славы Господа / и блажим
христоподражательная деяния твоя, / яко бо
крин благоуханный в пустыне Карагандинской
процвел еси, / дарами духовными облагоухая
душевные наша чувства / и трисвятую песнь
пети Богови подвизая: / Аллилуиа, аллилуиа,
аллилуиа, Слава Тебе, Боже.

Стих: Честна пред Господом / смерть
преподобных Его.

Небесныя пресветлыя обители / восприяша ты,
новаго гражданина, / преподобне Севастиане
прозорливе, / в нихже, радуяся, со ангелы и
преподобных отец соборы водворяяся, / со
апостолы и пророки и святители ликуя, / со
мученики и праведники торжествуя, / с
веселием Присносущней Троице предстоиши, /
трисвятую песнь воспевая: / Аллилуиа,
аллилуиа, аллилуиа, слава Тебе, Боже.

Стих: Блажен муж, бояйся Господа, / в
заповедях Его восхощет зело.

Яже божественный языков апостол Павел,
видев, написа: / око не виде, и ухо не слыша, /
и на сердце человеку плотяну не въздоша, / яже
уготова Бог любящим Его. / Сих по
преставлении твоём, блаженне Севастиане,
достигши, / непрестанно Триипостасному
Божеству херувимскую песнь взываеши: /
Аллилуиа, аллилуиа, аллилуиа, / слава Тебе Боже.

Слава, глас 5:

Песни Богогласныя приносим Ти, Христе, /
Сыне Единородный и Превечнаго Отца Слове
Соприсносущный, / в послѣднія дни от
Приснодевы Пречистыя и Духа Святаго
воплотивыйся, / Крест и смерть и погребение
плотию за грехи наша претерпел еси волею, / и

воскрес еси славно, яко Бог, / человека возводя
в первообразное блаженство, / егоже добрый
пастырь, премудрый учитель и прозорливый
старец наш Севастиан / равноангельное на
земли житие и терпение гонений совершив,
достиже. / Егоже молитвами Иисусе, Царю всех,
/ Православие и мир утверди во Отечестве
нашем / и небеснаго Царствия Твоего сподоби
нас.

И ныне, Богородичен, глас тойже:
Храм и дверь еси, / палата и престол Царев, /
Дево Всечестная, / еюже Избавитель мой,
Христос Господь, / во тьме спящим явися, /
Солнце сый правды, просветити хотя, / яже
созда по образу Своему рукою Своею. / Темже,
Всепетая, / яко матерне дерзновение к Нему
стяжавшая, / непрестанно моли спастися
душам нашим.

На благословении хлебов тропарь преподобного
дважды и Богородице Дево: единожды.

Тропарь, глас 3:

Троицы Святыя служителю, / земне Ангеле и
небесне человече, / духовнаго Оптинского
старчества преемниче, / Христов
священнотаинниче и исповедниче, / Духа
Святаго обитель всечестная, / преподобне отче

Севастиане, досточтиме, / испроси мирови мир
/ и душам нашим велию милость.

На утрени

На Бог Господь: тропарь преподобного дважды,
Слава, и ныне, Богородичен:

Тя ходатайствовавшую спасение рода нашего, /
воспеваем Богородице Дево: / плотию бо от Тебе
восприятою, / Сын Твой и Бог наш, / Крестом
восприим страсть, / избави нас от тли яко
человеколюбец.

По 1-й стихологии седален, глас 4:

Аще и посреди молвы житейския / в заточениях
лагерных пребывал еси плотию, / но от Бога
мыслию, молитву Иисусову творя, не отступал
еси / и Той от юности твоя от тебе николиже
отступи, / преподобне Севастиане исповедниче.
/ Темже и мы, грешные, молимся тебе: / не
остави нас немощных, / но благодать Святаго
Духа привлецы на нас / и просвети наши
смыслы, / прилоги вражии помраченные.

И ныне, Богородичен, глас тойже:

Услыши, Владычице, / от болезненная души
вопиющая раба Твоего, / и многих лютых моих
зол подаждь оставление, / избави негасимого
огня геенскаго / и постави мя одесную Сына

Твоего, / день бо и ночь предстательствуеши о нас, Всесвятая.

По 2-й стихологии седален, глас 1:

Погубих талант мой, егоже во святом крещении приях, / увы мне, что сотворю? / Где обрящу другий? / Како явлюся к нелицеприятному Судии? / Что ли отвечаю ему? / К тебе убо притекаю, преподобне Севастиане богоносе, / да будеши теплый заступник мой / с Пречистой Богородицею, Господеви моляся / даровати ми оставление грехов / и милость в день судный.

Слава, и ныне, Богородичен, глас тойже: Управи, Владычице Чистая, / окаянную мою душу и ущедри ю, / от множества прегрешений во глубину погибели погрузившуюся и в час мя страшный смертный / демонов оглаголющих и всякия муки исхити, / покрывая пречистым омофором милости Твоея.

По полиелеи седален, глас 6:

Приидите христоименитых людей множество / в память досточтимого отца и старца нашего соберитесь, / обстояще всеблаготворейно честную его и многоценную раку, / радостно лик псаломский составим днесь / и молебно возопиим ему: / преподобне отче наш Севастиане, / на небеси предстоя Христу Богу

нашему / и Пречистей Деве и Матери Его /
молися о стаде, тобою собранном / избавитися
нам наветов вражиих, / умирить мир и спасти
души наша.

Слава, и ныне, Богородичен, глас тойже:
Пресвятая Богородице, / во время живота моего
не остави мене, / человеческому
предстательству не ввери мя, / но Сама заступи
и помилуй мя.

Степенна, 1-й антифон 4-го гласа:

От юности моя:

Прокимен: Честна пред Господем / смерть
преподобных Его.

Стих: Что воздам Господеву о всех, яже воздаде
ми?

Евангелие преподобномученику, от Матфея,
зачало 38.

По 50-м псалме стихира, глас 6:

Евангельски Бога возлюбил еси, / мира красоту
и суетную славу оставив, / спасительныя
Оптинскаго старчества достигл еси пристани, /
взем крест свой, последовал еси Христу,
радуясь, / идеже темницею многовременною, /
неядением лютым и долготною жаждою
утомляемь, / Христа, пособствующа тебе, обрел
еси, / преподобне Севастиане исповедниче, /

темже и вселися в тя Пресвятый Дух, / иже
изведя тя от уз темничных, / пастыря и учителя
заблудшим дарова, / от диавольския ловитвы
тех изымающа / и к единой, святей, соборней,
апостольской Церкви приводяща. / Помози убо и
нам, преподобне, / от сетей лукаваго исхити ны,
/ и доведи до Царства Небеснаго.

Канон Богородице со ирмосом на 6 и
преподобному Севастиану на 8, глас 3:

Песнь 1.

Ирмос: Сушу глубородительную землю / солнца
нашествова иногда: / яко стена бо, огусте
обаполы вода / людем пешемореходящим / и
Богоугодно поющим: / поим Господеви, славно
бо прославися.

Молебное тебе пение предначиная, смущаюся,
отче преподобне. Како достойно есть воспевати
тя? Обаче же от любви приношение мое приими
и устне мои отверзи, яко да возведу хвалу твою,
Севастиане, досточтима.

Море страстей ты немокренно минул еси,
преподобне, от враг невредився: бесов
ополчения кротостию и смирением во глубину
преисподния низверг еси, безбожных же человек
хуления молитвою усмирив еси, поя Господеви,
славно бо прославися.

Погуби огнем молитв твоих, чудоносче, супостаты, гонящия мя. Се бо злыя помыслы и греховныя деяния настизают уже и несть мне избавления, аще не ты, преподобне, защитиши мя и абие истребиши я, якоже древле погруженныя египтянов колесницы и тристаты. Богородичен: Моих прегрешений, Владычице, пленицы расторгни и томящий мя грех, Приснодева, низложи, яко да благодарне воспеваю Тя всегда, Всенепорочная, Тобою спасаем.

Песнь 3.

Ирмос: Непопдная душе и бесчадная, / стяжи плод благославный, / веселящися, возопий: / утвердихся Тобою, Боже, / несть свят, несть праведен, / паче Тебе, Господи.

Делатель быв, блаженне, заповедем Господним, непрестанно в них поучаяся, любвию же Христовою воспламеняем, в гонении твоём муки претерпел еси многообразныя. Сего ради, радуясь, вшел еси в радость Господа своего, вопия: несть Свят и несть Праведен, паче тебе, Господи.

Всего себе возложив, преподобне, Богови, жилище явился еси Пресвятаго Духа и Ангелом и преподобных ликам единоправен. Темже в небесных кровях со преждеотшедшими

Оптинскими старцами водворяясь, единогласно
воспел еси: несть Свят, несть Праведен, паче
Тебе, Господи.

Образ иноческаго жития и священства правило
был еси, досточтиме, столп терпения, пример
мужества, веры утверждение, надежды
окрыление, любви умножение, бесов и лукавых
человек посрамление, не ведущих пети: несть
Свят и несть Праведен, паче Тебе, Господи.

Богородичен: Благоутробием Твоим,
Богородительнице, всякаго мя избави
осуждения, к Тебе прибегающа, и Тебе
припадающа, и призывающа Твою
благомощную помощь.

Седален, глас 4:

Мира красоту и яже в нем тленная нивчтоже
вменяя, / пустынное пребывание со
Оптинскими старцы паче возлюбив, /
рукополагаемъ же от Христа Бога, / чистотою
жития священства одежду убелив, / поношения
за Христа и гонения, радуясь, прияв, /
бесплодную пустыню и град Караганду
облагаухал еси, / преподобне отче Севастиане
досточтиме. / Темже ныне града Небеснаго
показался еси житель, / в немже со ангелы и
собором святых ликовствуя, / помяни и нас

недостойных, / верою и любовью почитающих
тя.

Слава, и ныне, Богородичен:

Множества скверных помышлений смущают
мой ум / и вожделения страстная возстают на
душу мою. / Кто исцелити возможет мя,
Пречистая? / Возстания же и озлобления
невидимых врагов моих кто исповестъ
возможет? / Но Твоими всесильными
молитвами, Благая, / от всех сих заступи мя, / и
избавление совершенное даруй.

Песнь 4.

Ирмос: Положил еси к нам твердую любовь,
Господи: / Единородного бо Твоего Сына / за ны
на смерть дал еси. / Темже Ти зовем,
благодаряще: / слава силе Твоей, Господи.
Со Оптинскими старцы и чудотворцы
предивными, ныне предстоя престолу Троицы
Живоначальныя, умоляеши Бога о граде твоём и
святем храме, утвержденном руками твоими,
зриши же и предсказанный тобою
величественный новый соборный храм, граду
Караганде священнолепное украшение. Не
отступай от нас духом своим, но присно
ограждай молитвами твоими, да благодарне
вопием: слава силе Твоей, Господи.
Зиму лютую и пустыни зной летний терпением

твоим победил еси, Христов исповедниче, теплоту духовную от веры и любви стяжав. Заповедь же Господню, еже злomu не противитися, до конца исполнил еси, за гонящих и мучающих тя моляся к благим Виновнику вопия: слава силе Твоей, Господи.

Богородичен: Помилуй, Едина Богомати, спаси и сохрани душу мою окаянную, потопляемую от бесов лукавых делы и страстьми. И прежде исхода моего сию покаянием и исправлением очистити помози.

Песнь 5.

Ирмос: К Тебе утренюю, всех Творцу, /
преимуществу всяк ум мирови, / зане свет -
повеления Твоя, / в нихже настави мя.

Луки злых сокрушил еси кротким терпением твоим и брань их смирением до конца разорил еси, богомудре. Град Караганду, яко Церкви Русския голгофу, сердцем твоим возлюбил еси, идеже в молитве, священстве, душепопечении и старчестве подвизався, венец нетления стяжал еси.

Не устраши тебе, преподобне, долгота жестокаго пути, вонь же, Христу Богу подражая, пошел еси, от богопротивных гонителей ссылаемь. И николиже уклонился еси от теснаго пути, вводящего в вечный живот, егоже в дни

Светозарныя Пасхи достиг еси, да богоявлен священным твоим исповедничеством явишися всем.

Таков нам подобаше Архиерей; преподобен, верен, несквернен, незлобив, языков апостол Павел, восклицая, преднаписа священный образ богоподражательных твоих нравов, досточтиме. Принеси о нас молитвы твоея кадило благовонное, да спасет Господь от вечныя гибели души наша.

Богородичен: Упование мое Ты еси, Пречистая, спасение и похвала, темже прибегаю к покрову Твоему, не гнушайся мене, грехи многими ныне поглощенна, но, предварив, спаси мя.

Песнь 6.

Ирмос: Бездна последняя грехов обыде мя, / и исчезает дух мой; / но прострый, Владыко, высокую Твою мышцу, / яко Петра, мя, Управителю, спаси.

Поем монашеския подвиги твоя, чествуем узы каждением и псалмы, мощем твоим покланяемся, яко ароматы страдальчества и тепения миропомазанья. И дивному во святых Своих Триединому Богу покланяся, ублажаем тя, досточтиме.

Нощию, яко днем, бдел еси и в житии своем не дал еси сна довольна очима твоима, ни веждам

дремания, дондеже сподобился еси видети праведных селения, поющих Пасху Божию спасительную. Сея радости и нас причастники сподоби быти молитвами твоими.

Призван быв, преподобне, Божественною благодатию послужити в Казахстанской стране во граде Караганде Всепречистой Матери Божией и равноангельное иноческое житие людям, тамо живущим, показати. Ты же, яко пастырь истенен, рассеянных от лукавых гонителей собирая, за стадо свое и за многих, хотящих спастися, душу свою положил еси.

Богородичен: Красоту ми ведети сподоби славы Твоея, егда от плоти моя имам разлучитися, яко утешение мое еси, Владычице, радование и умиление.

Кондак глас 3:

В радость Господа Воскресшаго вшедшаго, /
преподобным Оптиным старцем сликовника, /
мучеников и исповедников сопричастника, /
священнотаинникам Божиим сослужителя, /
земна Ангела и небесна человека, / града
Караганды боголепное украшение, /
Казахстанския страны богомольца изрядна, /
Церкви Русския похвалу / ублажим, вернии, / с
веселием ему вопия: / радуйся, Севастиане,
преподобне отче наш.

Икос:

Евангельскому словеси радостною душею от
млада внимал еси, преподобне, / душевный
разум вперив к истинному Свету, /
душетленные страсти до конца потребил еси, /
смирненным и безмолвным житием предивен
бывый, / сего ради теплый к Богу о нас ходатай
показался еси. / Егоже моли даровати нам
достойно, / тебе подобно, послужити Ему, /
исповедниче веры благочестивыя и образе
кротости духовныя.

Песнь 7.

Ирмос: Трие отроцы в пещи, Троицу
прообразивше, / прещение огненное попраша /
и, поюще, вопияху: / благословен еси, Боже отец
наших.

Нищ духом, по словеси Господню, богатство
долготерпения и добродетелей стяжал еси,
имиже угодил еси Владыце Небесному, и
Царство вечное унаследовал еси, вопия:
благословен еси Боже отец наших.

Огнь лютый гонений и долготерпение трудов
болезненных, роса бысть тебе, блаженне.

Фараона бо мысленнаго морем слез и током
молитв твоих потопил еси, в радости душевной
вопия: благословен еси, Боже отец наших.

В седмерицею разженной пещи злохулений,

гонений и искушений неврежден сохранивыйся, досточтиме, преподобне страдальче, и мене из пламене греховнаго неопально изми, да якоже в житии твоём, тако и в чудесех твоих прославится благословенный Бог отец наших. Богородичен: Яко разбойник, взываю Ти: помяни мя, Человеколюбче, плачу, яко блудный, и вопию: кающаяся приими, согрешивша спаси, Богородицы ради, Многомилостиве.

Песнь 8.

Ирмос: Вещественнаго огня пламень / невещественным увядиша Богозримии отроцы и пояху: / благословите вся дела Господня, Господа.

Течение веры, яко солнце землю от конец небесе, претекл еси доблественне, яко страдалец - монах и Божественный иерей, сугубо от Церкви Зиждителя венчаем и радуясь, поя:

Благословите, вся дела Господня, Господа.

Путь жития пространный, сладостию прельщающий нас, обличай, богомудре, яко лживый, и скорбь великую душамносяй, яко да радостно в долготерпении сотворим узкаго пути терновое шествие, поя: Благословите, вся дела Господня, Господа.

Православным христианом испроси, преподобне, мир, здравие и спасение, и на

враги одоление, да в радости душевной
возопиим: Благословите, вся дела Господня,
Господа.

Богородичен: Наляцы и царствуй, Иисусе, Царю
царствующих, православным споборствуя, и
всех окормляя к Царству бесконечныя Твоея
славы, молитвами неизреченно Рождшия Тя.

Песнь 9.

Ирмос: На Синайстей горе виде Тя в купине
Моисей, / неопально огонь Божества заченшую
во чреве, / Даниил же Тя виде гору несекому, /
жезл прозябший, Исаия вzywаше, от корене
Давидова.

Иноческая тихая и безмолвная Оптиная пустынь
от богопротивных разоренная, и многая лета в
плаче и сетовании бывша, ныне убо радостию
веселится, понеже не токмо первообразная
красота ея паки возвратися, но и цельбоносныя
мощи духоносных старец яви в ней Бог. С нею
же и град Караганда свеселится, единого от
дивнаго преподобных отец собора мощи
досточтимого Севастиана Оптинского в себе
имуща, иже великий Дародатель Церкви Своей
даровал еси.

Светлостию подвигов богоприятных просиял
еси, отче, и восприял еси благодать молиться о
нас, вспомошествовая верным в подвигах

спасения, яко сосуд Благодати Божия изрядный. Неприступным светом Божественным осияваем, и в вышних обителях со святыми ликами водворяясь, Зиждителю всяческих и Спасителю человеков о стаде, тобою собранном, моляся неоскудно не престай, прилежно просим тя, досточтиме.

Богородичен: Пощади мя, Господи, егда приидеши судити миру всему, и не осуди мене по достоянию дел моих, но милостию Твоею спаси мя, молитвами Пречистыя Богородицы, предстательством преподобнаго Севастиана, досточтимаго исповедника, и всех святых, от века Тебе благоугодивших.

Светилен, глас 6:

Возлюбленное и вожделенное тебе от младаго возраста / светоносное имя Иисусово, / егоже всегда во уме и сердце молитвою держал еси, / новаго тя, Моисею подобнаго, Боговидца содела, / во мрак таинственный священнотайне входящаго. / Темже, небоявленне Севастиане досточтиме, / и мою душу, мраком греховным покровенную, / просвети любви Иисусовы зарею, / и на безстрастия гору смирением возведи.

Слава, и ныне, Богородичен, глас тойже:
Светозарная Божия палато / и недоуменный
Светодавца Престоле, / Мати Безневестная, /
просвети нас светом Сына Твоего, / да образ
Божий, помраченный страстьми, / паки славою
первозданною просияет в нас, / воистину
Богородицу Тя исповедающих.

На хвалитех стихиры, глас 2:
Богомудре отче Севастиане, / душу твою и тело
от страстей очистив, / Святому Духу обитель
прекрасная явился еси, / иже ты славна
прозорливца концем Российским показал / и в
чудесех велика светильника содела, /
просвещающего во тьме грехов сущих, / темже,
яко наставника ты всем верным, / сошедшеся,
досточестне, ублажаем.

Стих: Восхвалятся преподобнии во славе / и
возрадуются на ложах своих.

Яко мудрый строитель, / не на песце
самонадеяния, / но на камене Христовы веры /
дом добродетели твоея смирением созидал еси, /
темже никакая скорбь и теснота, / ниже кое
искушение и беда, / ни гонение, ни мучение /
не возмогоша от любви Божия разлучити тебе, /
досточтиме богомудре отче Севастиане, /
молитвами твоими спаси души наша.

Стих: Честна пред Господем / смерть

преподобных Его.

Вся пристрастия мирская оставил еси: / ни
имения когда, блаженне Севастиане, стяжав, /
ни сладостей и прохлаждения жития вожделев,
/ ни славы суетныя возлюбив. / Темже, егда
Воскресший Господь возгласи тебе, / радостно
душею твоею к Нему пришел еси / и, яко
исповедник, в чертозе Агнчем водворился еси, /
яко един от страдальцев Казахстанския земли /
и блаженный сонаследник Христов. / Емуже не
престай моляся, / спасти и просветити души
наша.

Слава, глас тойже:

Велие воистину чудо зрим: / како ты, богоносе
Севастиане, в мире живой / и соблазны
отовсюду окружен, / равноангельныя
добродетели исполнил еси / и, противу духов
злобы поднебесных / во плоти подвизався, / тех
крепость низложил еси, / противу же
богоотступных и богохульных человек
неистовства / кротость, смирение и молитву
безмолвную являл еси. / Бессмертия славою от
Подвигоположника Христа увенчанный, / не
престай моляся Тому / даровати Отечеству
нашему мир / и душам нашим велию милость.

И ныне, Богородичен гласа.

Славословие великое и отпуст.

На литургии

Блаженны от канона, песни 3-я и 6-я.

Прокимен: Честна пред Господем / смерть
преподобных Его. Стих: Что воздам Господеву о
всех, яже воздаде ми? Апостол ко Ефесеем,
зачало 233. Аллилуарий: Священницы Твоя,
Господи, облекутся в правду / и преподобнии
Твои возрадуются. Стих: Блажен муж бояйся
Господа, в заповедех Его восхощет
зело. Евангелие от Луки, зачало 64. Причастен:
В память вечную будет праведник:

